

聖



鳳洲筆記卷之十六

海虞文臺黃美中



名卿績紀四

揚一清字應寧巴陵人也數歲能屬文應奇童
 舉至京得召見 英宗皇帝時與李東陽先後
 馳名十八登進士授中書舍人九載擢山西按
 察僉事督學政大有聲母喪歸復補陝西進按
 察副使其政視山西更過之所識拔士李夢陽
 康海輩多貴顯者一清既久留滯關中不能無

望時執政然以其暇究邊事甚悉召爲太常少
卿調遷南京太常卿陝西馬政多廢弛初高
皇帝通互市諸番諸番人欲得漢地茶甚急願
以馬易許之初曹國公李景隆以金牌往曹國
公得馬萬九千匹分隸諸苑監自後往來不絕
憲孝時禁稍解私茶盛行番人無利于官馬至
者漸少時議復舊制擢一清副都御史經理之
一清至大申飭故律令召募市易爲嚴其出而
寬其入斥去貪賂屬吏居數年馬益蕃息天子

以爲能命總督全陝三邊軍務撫鎮而下咸屬
焉特虜歲入殺掠吏民夷丘焚巷邊人習爲畏
縮坐視無敢膺鋒者一清素有才畧至則練習
敵騎修陣法其苦同之士爭願爲死前後一清
者皆不如也久之遷右都御史一清上疏請築
邊牆其畧曰寧夏花馬池至靈州地里衍漫賊
入不利寧夏內地徵兵於未寇太煩調兵於
旣來無及請自延綏定邊營起至寧夏三百里
因舊牆增築高厚補空缺列烽燧亭障戍卒更

番休息上多置矢石賊小寇則戰大寇則舉燧諸軍就利便接伏九用丁壯九萬人限四月工就詔下兵部如一清指修築僅四十里而役工以寒故怨幾潰圍騎射之稍稍戢而會逆瑾非一清尼之乃止乞病歸亡何瑾緣它事鈎拮一清捕下獄因門人通款瑾始釋又二載寧夏宗室寘鐠叛詔起一清督軍務如故佐太監張永討之師至賊已平永與瑾內爭寵不相能也時一清為永謀急歸發瑾陰事誅之永入柄司禮

一清繇是召拜戶部尚書加太子少保改吏部李東陽時在內閣與一清善皆喜飭名譽以文絡天下士互憑借為重焉山東盜大起一清上言諸便宜狀俱見可進少保太子太傅復進少傅武英殿大學士錢寧方得幸武宗偶以事怒一清逐之歸今皇帝即大位一清復起為總督陝西三邊軍務餘官如故一清至是蓋三往其部曲舊校見無不踴躍喜然老矣所經畫視前稍劣召歸進少師兼華蓋殿大學士主上英

斷自決大政事而新進貴人張桂等多信已所
取否一清以模稜處之且從家人子弟為利奸
時論大貶後策免居鎮江卒一清生痿病不能
御婦人無子

王瓊字德華山西晉州人也舉進士為戶部郎
歷藩臬二千石皆第最 武宗朝召拜戶部侍
郎進尚書久之改兵部瓊為人多計筭穎敏默
識凡天下兵馬數多寡強弱及塞隄夷險徧裨
否才一覽悉計無遺 武宗末政在宦武多遊

倖飢民乘間起為盜最大者山東劉六河南趙
鐃蜀藍鄆江西桃源華林瑪瑙多者至二十餘
萬攻城剽府庫驅壯士從老稚掠充食劉趙輩
尋為尚書彭澤陸完先後平餘黨次起日益盛
封事告變旁午瓊手錄指悉計合機宜虜嘗入
寇山西一得利踰歲乃復獵境上陽若東者瓊
曰是必趨舊利奏集諸鎮兵據山西要害賊果
入大敗之進少保太子太保陳金討兩廣蠻有
功謂指出瓊進少傳贛州盜大起王守仁時巡

撫請得從軍興法便宜行事瓊才之威報可果
以次賊平而瓊又再進少師太子太師寧王反
報至朝中外惴惴亡人色而瓊益治兵自如且
曰吾久用王守仁上游何耶度反已執之亡何
守仁果執王時都督江彬得幸瓊陰與厚結所
言無不當瓊得以成功者彬力也瓊惡吏部尚
書陸完位居上會完以罪去遂代之然貪財好
睚眦中人為吏部大不稱今皇帝即位言官論
其奸狀有指詔下獄內閣臣楊廷和欲論瓊死

已赦出之成遼左瓊既已就戍益大恨廷和廷
和因議禮不合罷歸瓊上疏自列語多侵廷和
釋為民虜大入陝殺掠吏民楊一清還朝難其
代詔復瓊尚書總督諸軍事瓊至修一清之政
加振刷焉掎角逐虜去斬獲累二百餘瓊上言
塩池北邊虜虜覘商人過輒入剽掠商以是絕
不肯來請外修塹護之然多風沙易滿改築墻
虜既阻墻不得進商乃肯稍復來邊人以配楊
一清進太子太保復改吏部卒瓊與彭澤俱號

一時名儒將其議哈密事相矛盾論者謂瓊議得云

逸史氏曰一清任邊重寄三皆有聲不爲相當無訾矣瓊有才而貪奸治世能臣也或問二子孰優曰其計也而墻塹等之便則可知矣

陸完字全卿長洲人補郡諸生闈敬借上命括奇貸江南啖張甚過蘇常廷曳諸生諸生競擊敬走完時實不與而隙者具完名首諸生狀聞巡撫王恕列敬罪上逮還完後舉進士而恕以

吏部尚書監選見完曰是故擊闈人者耶擢御史當已而爲御史果有聲累遷至兵部右侍郎霸州民劉六劉七起群盜驍勇善射騎前後官捕之不勝稍稍行劫掠聚衆至數萬人詔左都御史馬中錫討之中錫儒緩好其名下教招撫陸七果至陽若爲就教者兵遂撤而陸七遂與其黨楊虎齊彥名益縱賊馳突中錫迺大悔無及詔逮下獄瘦死而完身自請往進右都御史假節用軍興法得誅二千石以下完乘傳驅至

臨清廣召募拘馬羸行守令修濬隍塹據要害
遣副總兵馮禎許恭遊擊將軍卻永襲楊虎於
宋門店龍化集大破之斬首千三百五十噉其
鏘又俘斬三百尋又鏖格裴子岩斬首二千俘
百五十諸路剪其蔓又不下千計楊虎死焉賊
自分為兩由蒙城太行流劫入河南境者尤狼
暴帥曰劉三趙風子有十三萬五千騎而都御
史彭澤咸寧侯仇鉞帥秦兵擣之
彭澤字濟物蘭州人弘治庚戌進士歷尚書工

部郎出知真定府累進按察使澤為人長大腰
帶十二圍偉顧盼燁如也平居鮮笑容雖與為
偶語叱叱聲若訾治真定勸課風禮號一時矣
守至按察乃以威猛聞召拜僉都御史尋進副
都御史分捕河南賊澤至則大陳軍容擐甲引
見諸大校責以退縮顧軍正論行法建燾諸大
校無不惕息惶恐頓首請自效良久釋之遂鼓
行前薄賊凡數十戰皆大破殺虜以萬計趙鏃
跳劉三死於陣於是給事御史上言河南賊平

陸完養寇自重下詔切責完惧日夜督諸將徼
賊連剿枝黨斬首捕虜共三千九百有奇而賊
陟岵隨脅聚燒運艘掠臨清邳徐而下犯淮安
又奔登州海套與完遇蒿淺坡時宣大鐵騎及
中土材官良家子悉集將十萬人合圍賊移日
大敗之斬首二千二百傷死又四千餘六七彥
名獸挾驍勇二百騎潰圍出星馳掠河西務將
北就達勒尼關險不得道狀兵又數千度河南
躡荆楚奪艘瓜洲掠泊通之狼山寨焉完窮追

截水陸道指授諸將四面前登山咸戴盾蹠行
持鎗礮且戰且上賊大潰六七先後赴水死梟彥
名斬首將陸百俘二百溺水死者又千餘還朝
完澤俱加太子少保右都御史予世襲錦衣千
戶完尋遷兵部尚書又遷吏部尚書加太子太
保時蜀盜藍廷瑞鄆本恕爲尚書洪鍾擊撫且
平矣餘黨廖麻子復起勢愈熾衆號二十萬鍾
毫不復能將師制詔澤克總督討之澤悉兵角
破賊殺廖麻子衆遂竄山寨多伏弩箚棘中澤

分兵搤出入奪水道度窘開一面縱夾誅之且

盡或云廖有異術能隱形既還加太子太保雷

萬騎入宣府大殺掠吏民將轉寇近地詔澤出

提督三關二路夕之虜退仍理都察院兵部尚

書王瓊素忌其有勇畧而澤好因酒使氣時特

出瓊上嬖人錢寧挾威澤行公卿間咸俛首折

節澤居切齒不能平瓊揣知因寧所遣親近語

事而邀澤飲且醉微挑之澤即嫚罵朱寧奴才

壞天下瓊且謬謂澤曰勿妄言選益奮不復可

止寧大怒而會哈密城及金印為土魯番所取

詔諭還不可且謀得將寇甘肅狀廷推澤經理

之澤調寧夏兵自使使諸土魯番予繒幣二千

銀盃一盃一求和還哈密城及印土魯番陽許

之澤輒奏事平乞骸骨澤歸而土魯番變矣薄

肅州芮寧全軍沒瓊條澤死罪朱寧欲從中下

閣臣力抹之罪免今上初徵拜兵部尚書以老

加少保致仕卒

逸史氏曰賊起延蔓創棘九京二省五陸完悉

此兵力僅勝之亦晚矣古稱豕之牙豈不信然明徵哉彭澤勇而踈所舉賊甚易薦紳先生紛紛訾王瓊以爲忌功云雖然哈密事一何舛也

馬昊關中人也本鄒姓冒馬云昊長身驍捷善騎射舉進士爲監祭御史擢按察僉事尋以御史時罪謫真定推官至則教吏士習武多布置四指民家有流劫奸盜亡命悉擒之再用前罪謫判開州吏士伏闕上言馬昊於真定稱保障

甚宜真定請勿謫詔許之亡何蜀盜籃鄢叛侵掠蜀合四省兵討未効吏部尚書言馬昊才可蜀按察僉事佐治兵昊至閱所部笑曰將不知兵若勝何擇驍勇材力之士千人分四隊隊各立長會賊來逼城昊夜出百騎舉砲擊賊營亂自蹈籍而悉兵從後乘之斬首四千級軍中皆喜以兵起未有者昊曰此尚未見大敵胡足喜宜及勝用之遂前遇賊賊方陣左而伏兵於右爲應昊以正兵當左而身與精兵百騎直擣伏

伏驚潰趨左陣左陣亦潰兵合擊火其柵大破
之斬驍將方四捕首虜降者萬人遷副使治兵
川東道賊延蔓勢尚張都御史高崇熙謀于副
使張思齊招諭賊賊請降而乞住劄臨江市空
其民乃可吳曰臨江市蜀襟喉上達重叙下連
湖相其地饒富沃衍此胡可餒賊自困耶獨益
飭治兵募召豪傑賊因不敢東伏漢州平填未
幾復反集衆至二十萬前後官兵戰俱敗績賊
遂圍中江因謀嚮成都吳以五千騎馳赴中江

賊走窮追之與總督彭澤合擊大破殺賊酋廖
麻子遂進右僉都御史巡撫蜀廖麻子死餘黨
尚數萬窟於東鄉山推喻老人帥之吳請于彭
澤曰山險不便騎射深入賊爲主或返矢便頭
發步兵三萬據出入要道賊當自餓死也澤如
吳言賊窘果縛喻老人請降而它賊在遂寧渠
縣者相繼平進副都御史喻歲虜亦不刺自西
海犯松潘蜀大振吳招土番爲間取道夜掩虜
虜驚潰獲馬及衣械夥事聞加祿奉一高拱筠

夔人普法惡倡諸夷部立寨僭號攻劫吳率兵
擣破之降者萬計獨青山寨不下吳行周視寨
曰此固高絕水道可下也乃遣兵據泉口而攝
南方圍待之兩日賊渴覘南圍薄夜走兵從後
追捕首虜又萬人執普法惡誅之遷右都御史
予一子錦衣百戶然吳好功名又欲討松潘夷
不勝逮下獄罷免

逸史氏曰嘉靖初胡世寧盛言於朝吳名將可
用也其撫蜀亦欲平松潘夷曰吳長用兵輕用

其長故敗臣短用兵重用其短必勝嗚呼名言
哉

陶魯字自強鬱林人父成爲按察副使從擊賊
兵敗死之主上旌死事者贈官錄一子入胄監
魯補焉二十授廣東新會丞魯機明內蘊而神
觀不足或從令尉列見上官獨昏睡雖督榜不
恤也大藤峽諸賊亂二廣都御史韓雍總師討
之檄魯隸麾下雍威嚴擬王者二司長吏見長
跪白事惛悚若不自勝一日顧峒賊最強險難

下者方設策魯時直膳侍左右謾謂曰丞揣我何意魯曰得非某賊耶雍曰然丞能往否曰匪直能且易耳雍怒曰賊銳甚又搯阻自衛非大兵不可入部下文武數百千人熟視無可當吾寄者吾方欲身往者安得易且使若食粟能之耳叢爾邑不能理乃言擊賊若妄當答魯不拜抗言曰夫賊難攻者非賊難也我難其攻賊者也謂魯解食粟不解擊賊者明公未悉我也蔣琬龐統廢邑事矣後乃為蜀名臣公幸毋棄


魯使得畢技當悉縛諸醜以獻雍異之改容曰若所將幾何而辨曰三百人足矣曰何少也曰魯猶以為多也兵貴精請擇雍曰任若為之魯乃標式約曰有能力舉百鈞矢射二百步者來三軍之士十五萬人其比於式者得二百五十人曰未也請復下令募募數日足魯乃為別將日操練陣法椎牛酒犒甘苦共之士爭頭為死率以先登大破賊斬首無筭賊穴所得士女金帛悉以分於三百人已無與者衆益奮韓雍大

博賞言於朝擢爲令累功進同知肇慶府事按察僉事副使使左右布政使錄其後爲錦衣千戶魯前後任廣東所殺及降者二萬七千餘賊聞陶家軍駭慄遁避不及遇即叩首乞爲良民得無死幸甚然此三百人耳服其心累用不踰語有之一夫決萬夫避况三百人乎

逸史氏曰士有遇有不遇也魯雖才非韓雍幾失魯後之大將其無忽哉

王憲東平人舉進士爲監察御史按吳憲精覈

於吏事好振時風紀貪墨吏多望風解印綬去累遷至兵部右侍郎宸濠反上親征憲兼右僉都御史先大軍治儲峙亡闕還代王瓊爲兵部尚書今上即位以言者論罷免亡幾起兼右都御史總制陝西三邊諸軍憲至則以軍法約束將士厚賞募間諜探虜虛實久之謀報虜傳箭將入寇憲預調集延綏固原寧夏兵二萬當賊入道伏而虜鎖合兒伯通千七百騎果由花馬池潰墻進攻八營固原叅將劉文伏發敗之斬



原件短缺

首九十三賊。馮趨哲思溝榆林副總兵趙英邀
斬首三十。又遁至青陽嶺榆林遊擊卜雲邀斬
首九十五。前阻復回過寧夏總兵杭雄邀斬首
九十五。獲馬五百二十二匹。鎖合兒伯通殲馬
捷。上加太子太保。召還叅贊留務。尋召理都察
院事。虜復東將窺覲上谷雲中。地下兵部議。須
威望虜素懾者。大臣填畧之衆。推憲當衆怒。且
却。乃置憲不推。推侍郎王廷相。梁材諫官言人
臣得自擇便利。不便利於國計。非而上亦怒。下

部尚書累加太子太保。然寡稱矣。

劉天和字養和。麻城人。自主事。改御史。監瑾勢
張甚。天和不爲屈。逮下獄。謫金壇丞。瑾敗。起知
湖州。湖人德之。遷山西提學副使。少傳楊一清
行邊才。天和薦之。以都御史撫甘肅。天和延故
老訪循。趙克國金城遺蹟。募士屯田。更西盡青
海。毋喪歸。漕河塞起。復視河道。躬負畚鍤。先
卒。疏汴自朱仙鎮至沛。飛雲橋。殺下流。又疏七
十二泉。自梟尼諸山達南旺湖。濬上流。告成事。

遷兵部侍郎總陝西三邊諸軍至上則言邊墻
之利與先臣瓊所未備者請以時增築詔可乃
悉委總兵梁震自定南至寧朔十七里皆創起
乾溝澗六十里則因山爲塹興武七十里因舊
跡稍堅厚而又采兵部郎許論議請以五六月
俟虜移軍門住花馬池調延寧固原竒遊騎兵
依墻爲守報可尋進尚書亡幾虜吉囊二萬騎
至定邊厄於墻不得進詭云北搶黃毛師稍懈
乃遣三騎坎而登衆驚潰虜遂大舉入抵固原

天和斬指揮牛斗郭卿及五總旗殉會靈雨亘
旬日虜剽清野無所得罷甚慮歸道泥濘墻險
不可出狼狽反天和調集都御史楊守禮趙廷
瑞尹嗣忠各鎮叅遊守備兵悉至陝西魏時兵
過其南黃恩兵阻其西崔嵩楊琮兵擊其北鄭
東王陞高暘陳爵兵拊其背而莊浪西寧涼永
魯瞻土兵復連絡來赴天和身率諸將任傑周
尚文夾攻大敗之斬首四百五十及吉囊第二
子小十王妻弟某餘衆遜出邊營東勝者大同

徼之斬首九十營賀蘭山者莊浪徼之斬首百三十寧夏徼之斬首五十募府計功上加太子太保予一子錦衣千戶餘遷賞有差天和召入命提督團營為言者論罷

逸史氏曰關中自王瓊後赫赫名者稱三制節云憲龍後俱本兵稍不稱天和之殺二裨人或尤之然士知有伍政矣

伍文定松滋人舉進士為常州府推官剛直能斷而多忤與提學御史抗諸生箠之幾斃猶曳

衣行行自若也後知吉安府寧王反報至都御史王守仁從間道避入城文定即閉門繕甲請曰賊烏合勢必敗而一時猝起無抗者公咸望素重宜即吉安起義集諸路兵擣其穴必潰身敢任靡下之役守仁曰善乃起兵治餉儲餼遂同擣南昌以勁兵自廣潤門入殺守者市肆按堵二日追及於樵舍寧王兵舟萬艘蔽江面文定薄堅冒矢石火燎鬚不動士爭殊死闔大破之獲寧王進江西按察使大闞張忠率師討賊

賊平無與內忌其功因見脇跪不屈執而撻之
竟移病歸上即位論功遷副都御史官其後錦
衣千戶雲南土帥鳳朝文叛加兵部尚書發四
省兵討之至則朝文死難漸息因乞歸卒時謂
寧王之役文定功第一進賢令劉源清蓋誅持
寧檄者尚氣好兵法後以侍郎討大同發兵不
利褫官爵今尚存故不爲詳傳云

逸史氏曰文定烈士也孤城孑然角強藩不爲
動衝強陷深至介冑之夫披焉夫江西固制帥

從憑揮霍提其領夾之不少矣夫

陳九疇字禹學曹州人多權畧善騎射歷仕至
肅州兵備土魯番寇肅州總督彭澤遣使約和
不得要領九疇奮怒曰彭公受天子命全陝重
寄不能身任利害徒模稜効弱宋故態何顏立
天地乃勵士卒繕壘堡捕繫番謀巴思等殺之
土魯番掠肅州游擊將軍芮寧戰敗沒九疇遣
奇兵襲其營却之而王瓊奏其激變下獄上即
位尋進按察使超拜都御史撫甘肅土魯番復

入寇九疇率兵拒戰陰賂番別部內外挾擊大破之上捷九疇當封而瓊黨有柄事者中土魯番流言復以報功誤逮論誣罔輸成天下寃之凡虜再寇九疇輒從間道入登睥睨從上射虜嚙指疑能分身號飛將云

逸史曰文帝漢賢君也思頗牧而失魏尚得馮唐言復用之嗟乎世無馮唐誰直九疇功哉

胡繼世寧子也幼讀書不大了了父亦棄之世寧調兵至江西兵官以世寧出且繼繼曰兵素

不習安能見我父哉兵官跪請教繼乃指示進退離合勢甚詳凡三日而世寧歸閱大異之顧兵官非能曉此者以詰不能諱其實告世寧歎曰我有子自不識何也自是擊賊必從繼方畧世寧十不失三繼策十不失一也世寧之上寧王事繼跪曰疏入必重禍柰何父曰吾業已身許國矣跡到世寧下獄是歲繼因念父病死世寧毋獨不哭曰此子在常作賊胡氏滅矣逸史曰余讀范純佑事私怪且惜之今於胡生

鳳洲筆記卷之十六
更可悲也夫天生才未幾而遽奪之何哉
曹謙博習子史有畧機揣兵事多曲中父雄立
功西北破寧夏調度寔資謙焉謙從楊一清學
一清家居謙遺書畧曰先生世所不可無者而
又世所忌也此何時哉彼勸先生出者非愛先
生者也然雄與劉瑾通姻好謙不能止瑾誅父
子俱死於獄一清惜之曰謙料人則明也處人
則忠也其所自料自處何哉嗚呼悲夫

鳳洲筆記卷之十七

安南傳一

海虞文臺黃羨



安南古交趾秦并天下益斥南荒服置桂林南
海象郡秦亡南海尉趙佗起兵擊捕叛者稍稍
易置故守令王之至其孫亡而漢因為置九郡
安南其一也光武時女子徵側徵貳反將軍援
討平之立銅柱界後漢置交州又為交趾郡至
隋文帝平陳廢郡置州煬帝更置郡唐武德中

為交州總管府至德中改安南都護府唐亡曲承美者土豪也據其地稱節度使而絕不通嶺表劉隱攻執之以其將楊延藝為節度使延藝卒子紹洪嗣紹洪卒州將吳昌茂起而代昌茂卒弟昌文嗣昌文殘虐不有衆迨卒而其僞將吳處坪矯知護楊暉杜景碩爭立管內俱亂起驩州刺史丁部領勇善戰率兵悉逐捕亂者遂自稱大勝王三年傳位子璉璉立七年而宋師平嶺表乃使使貢方物求內附詔授安南都護

進封交趾郡王貢歲歲不絕太宗時部領老死亡何璉亦死弟璿嗣尚幼牙將黎桓挾權錮璿蠶食其族而代為節度使事聞太宗怒發兵步騎自邕人舟師自廣入進其境咸敗歸帥坐軍法抵罪而桓歲使使來謝罪求封上春秋高稍厭兵而桓請無已貢物盛許之授安南都護進封交趾郡王桓雖詳為服中國者而兵郡邑寇盜剽民居廩食子女萬計詔切責之桓即謝罪真宗立進封南平王尋卒子龍鉞立未封為弟

龍廷所殺即封龍廷爲交趾郡王改名曰至忠
復爲大將李公蘊所殺請封封公蘊如至忠進
封南平王卒子德政嗣卒子曰尊寇敘邕諸州
安撫使余靖發兵與占城合而夾攻之乃上表
謝爲罷兵尋擊虜占城王僭稱帝國中天子固
知之分莫較也卒子乾德嗣卒子陽煥嗣陽煥
卒子天祚嗣乾德故側室子奔大理以其兵內
不果孝宗朝進封安南國王卒子龍韜嗣卒子
吳崑嗣謝表不至輟加恩云卒亡子以女昭聖

主國事遂爲子夫陳日照所有日照故福州長
樂人謝升卿也識書美姿貌而落拓不事家人
產殺人變姓名之安南見國相會應試居首而
王女從窓隙窺而悅因歸之有安南政封國王
時元已破蜀輕兵下大理而使使招之日照未
見強大狀下使獄破竹束體入而繫之元將怒
率精騎日夜馳抵境大破其守兵乘勝圍國都
日照跳匿海島元盡焚其宮廟發藏貲屠戮其
人而反日照還不得意奏於宋請傳位子威晃

宋授威冕國王而尊為大王元既滅宋威冕惧
易名光昺請降元即故封授之尋卒子曰烜嗣
元所以督攝安南甚苦歲責供巨億不可支而
復設達魯花赤叅其國事日烜意惡未決會元
伐占城假道因發兵拒不前而元鎮南王急擊
大破之復追破國都日烜走清化其弟益稷降
元即拜為安南國王父之暘暑選師其後軍為
日烜所迫多敗死者父之鎮南王復來伐入國
都已而返元兵凡三破國殺獲幾十萬然終不

可久而日烜亦進代身金人贖罪詔止不伐日
烜卒子曰燇嗣日燇卒子曰套嗣日套卒子曰
曠嗣日曠卒子曰焯嗣日焯卒子曰燿嗣為貢
歲不乏然元亦取羈縻而已無所望之

大明洪武二年 高皇帝既已北定元遣詔諭
海外諸國而世子日燿遣其少中大夫同時敏
政大夫段悌黎安世等來朝貢方物因請封爵
六月抵應天詔遣翰林侍讀學士張以寧典簿
牛諒往使其國封日燿為安南國王塗金銀印

龜紐詔畧曰咨尔安南國王陳日燿惟乃祖乃父昔奠茲南土傳之子孫世世克恭臣職以永世祿朕荷天地之靈肅清夷夏頃以書往報冀咸享安樂而尔首奉表來賀睠茲勤意深可嘉尚是用冊爾為安南國王爾尚益茂令猷永為藩輔欽哉別賜大統曆一織金文綺紗羅四十二使者人文綺一羅一紗二以寧等十月抵國界而日燿等以下五月先卒弟日燧嗣遣大夫阮汝亮來迎請詔印以寧不可乃復遣杜舜卿等

請命先是占城舊縻役安南歲有貢頗苦督迫而勢漸以益強遂與安南抗日燿數遣兵擊侵敗之於是占城王遣平章蒲旦蘇都等告急乞援兵冬十二月壬戌明翰林編脩羅復仁禮部主事張福持詔兩解俱罷兵復仁還奏安南王贈遺使者黃金吉貝布不受上嘉之而加賜其國使人遷復仁等官是歲明中書省禮部臣言安南高麗既內附國山川宜有祭詔曰可而安南山二十一日佛跡曰徹圍曰武寧曰先游曰

普賴曰萬劫曰傑特曰安子曰地觀曰天養曰
神頭曰龍岱曰文塲曰安復曰卞曰立石曰香
象曰崇曰都隆曰測曰分江六曰川盧曰富良
曰天黃曰大歷曰蘇歷曰三帶水六安石淵曰
石龍門曰茲廉曰浪泊曰越裳宛曰九德宛俱
載祀典三年四月安南使杜舜卿等以王日燧
卒來告哀請命上素服御西華門見遣翰林編
脩王廉往祭尋遣吏部主事林唐臣持詔封日
燧為安南國王四年二月侍講學士以寧編修

廉吏部主事唐臣還自安南王日燧遣阮汝亮
表謝恩獻方物以寧卒於道是歲冬日燧兄叔
明殺日燧自立五年二月遣陪臣阮汝霖來朝
貢馴象禮部已受表將入見主事魯魯取表副
視之曰前王陳日燧今叔明何也白尚書詰使
者得其故奏上上怒曰島夷何狡獪如此却不
受六年正月叔明更遣使譚應昂等奉表謝罪
貢方物請封應昂為叔明言日燧寔病死叔明
遜於野國人請立之上曰日燧死爾國人當為

服叔明且以前土印視事俟能填撫人民恭順
無闕更議之仍賜應昂等紗羅有差七年三月
遣正大夫阮時中陳謝貢方物且自稱年老授
政弟熾許之叔明雖已授熾政然實自專制八
年熾來貢九年復遣通議大夫黎亞夫來貢詔
以其太數止之十年賜陳熾上尊文綺既至熾
已死叔明更署弟熾代國事十一年遣使謝恩
貢馴象方物且來告熾喪詔賜熾文綺紗羅中
使陳能吊祭熾十二年二月禮部尚書朱夢炎

奏定遣使安南相見禮凡使者抵境先報王遣
人郊迎設香案王府正堂龍亭置公館王率寮
屬至館具鼓吹身前導使者從至王府使者立
龍亭左王與僚屬就位行五拜三叩頭禮使者
與抗禮居左王居右時安南占城雖以詔故陽
罷兵而安南疆吏爲寇剽占城不已上詔責叔
明畧曰書不云乎毋爲亂首尔國與占城構兵
十餘年朕未覩是非所在然以社稷爲博剽椎
焚遺男女不得耕織朕兼愛海外元元甚愍之

往者以詔諭爾等使寢戈紆忿爾寔不奉詔賜
解陰搆毋乃首亂違書戒哉春秋列侯國無慮
百數相繼進滅無他背君好戰二者已耳爾其
鑒之二十年九月明皇帝萬壽節煒遣使獻誕
馬三十詔答幣帛有差久之德明卒二十一年
陳煒爲國相黎一元幽城外大陽坊十二月殺
之立德明子日焜立國事一元德明婿也一名
季犛二十六年明詔安南國殺君不道絕朝貢
廣西都指揮使司布政使司毋得納使者至二

十九年正月日焜始以德明喪來告上謂禮部
臣曰叔明弒日燧而有其國今一元又弒陳煒
矣更吊慰之是與亂賊厚也勿許時日焜又遣
兵取思明府地三十年正月明遣行人陳誠呂
讓諭還地久不決誠讓貽書日焜使者不佞辱
主上明命久未決無以復主上也使者今援古
證今拆利觀害以告執事在後漢時徵側叛馬
援討夷之立銅柱經内外界唐虞五管之一宋
始自樹然乾德寇邊郭遠討之擒僞太子洪真

乾德俱而割廣源門州思浪蘇茂桄榔之地降
元初有天下尔先王光炳首稱臣脩貢迨日
烜嗣改操於是世祖來討尔日烜蒙荆棘竄島
浮舶城郭宗社人民幾盡日燁鑿前之失祈命
於元且曰向者天使辱臨小國迎送止祿州俱
冒侵越之罪不敢過丘温也則是丘温以北地
不在爾國明矣今爾國迺越淵脫踰如熬慶遠
而盡有之將乘元末亂假隙僥倖而得之耶行
人下車之日主之君臣皆曰此地故屬安南不

言所以始也無乃爲大言誑我耶抑王惧以侵
地得罪強自飾耶主上神聖不計王前罪乃計
王飾罪耳其熟圖之日烜復書辨不已且遺誠
等黃金二錠白金四錠沉檀香百斤誠等却之
日烜曰贖也陸賈昔受之何辭誠曰尉佗以彈
丸黑子地與疆漢抗是賈禍也陸賈受重賂分
諸子是賈利也王以尉佗自處因耳乃欲陸賈
我乎日焜無以難更咨戶部曰伏見上司爲思
明府奏侵占地遣行人陳誠呂讓至下國今還

之下國竊惟丘温如螯慶淵脫五縣自昔供輸
下國賦後世世無爽而洞登乃淵縣之地天使
往來之路其思明府憑祥人每歲與下國淵縣
人交割夫騎於憑祥界坡羅唯關今思明人乃
謂下國於其地洞登立站侵占何戾也夫立站
者意以畧得其地耶地舊屬我又何俟圖夫所
以建室舍者蓋上司有把截過界之命稍戢使
吏宿耳已乃復撤何預於侵又謂元特大軍二
次捕交回軍設永平寨置軍填責發交人助糧

餉竊效元師二次來伐多不利歸史雖諱不詳
然至鎮南王則曰王在內傍關賊兵大集以遏
歸師王遂由單巴縣趨孟州間道出觀此則軍
勢可知歸路覓辦豈有回軍永平而設寨以守
又責交人助糧餉者哉又謂下國越過銅柱二
百余里侵占其所屬丘温等五縣者計銅柱初
立時至今一千二百五十餘年凌谷遷變誰復
能辦又謂拘問老人黃伯顏供說云說云者伯
顏亦思明人豈不同其欲雖千伯顏將何信耶

又謂因前王官失於申明作襲牧職盡器具呈
及以建武誌爲說者豈有廣成之高魯祖父不
識古事識古事乃在廣成耶下國與思明接境
思明之人徃徃侵占下國田土殺掠人民牛畜
下國僻在荒裔無所告愬思明狃小獲乃啗大
利而誣至此下國固畏罪自反不暇何敢有侵
占哉夫苟有侵占豈難退還今不侵占何以退
還此五縣乃下國世世相傳所守之地必不敢
付之思明惟 聖天子一視同仁與天地同德

故下國以此自恃而敢傾心陳懇焉敢逃罪誠
等還上召群臣議或以其抗命當討上曰蠻夷
相爭古有之彼恃頑不服當取禍耳毋動乂之
國相季犁復弒日焜而立其子胡查自稱曰太
上皇明建文君即位使使者來朝貢方物五年
太宗皇帝自燕起遣詔諭安南諸國永樂元年
胡查遣使賀即位別貢方物其辭曰昔我前王
日燿首倡群服輸嚮先帝先帝是以嘉惠下國
貢賜之使絡繹南北無絕不幸日燿死喪支庶

零洗無可嗣者臣胡查不佞以陳氏甥為衆推
迫理國事且四年矣徼幸聖化四疆謐宇家頗
人給然未蒙一位號無以供事上及主祀率下
也天朝辛亥憐之下表禮部議安南絕遠多詐
難信宜遣使廉察之詔可是月行人楊渤等持
節諭其陪臣耆老曰得胡查奏欲就封者果陳
氏甥否陳氏得無絕否爾國人誠欲戴之否得
別有篡殺之故否其悉心以答毋誑秋八月分
賜諸蕃王文綺紗羅諸物安南以行人呂讓立

智往十二月行人楊渤還以耆老臣衆表上與
查表合遂許封是月禮部郎中夏止善往封胡
查安南國王二年六月遣使者奉表謝恩詔還
思明府侵地八月更勅安南王胡查曰邇者占
城奏爾攻掠彼地剽人畜蕩廬舍又邀奪貢道
逼與冠服印章使臣屬甚非遵奉一統之義思
明府臣來言爾奪其西平祿州永平寨北中國
疆土也爾何得擅取之不俊必討無赦是月安
南故臣裴伯耆詣闕告急曰臣事陳氏祖父皆

執政大夫女又親屬也臣故少得左右陳王既長爲武節侯陳渴真裨將統兵填東海三十二年臣代渴真將而奸臣黎季犛弒主篡位屠戮勛賢族者無慮百數臣聞變勢不能抗并軍遁海島附番舶得此至臣兄弟妻子肉季犛之几久矣季犛乃故經畧使國老子世任心膂叨竊榮寵子蒼亦貴仕也一旦得志遂覆陳宗擅易姓名曰胡一元子蒼曰胡登僞號改元大逆無道陛下念陳氏忠順之跡憫此無告遄施吊代

臣得負努前驅膏血草野以報陳氏足也上令有司給衣食踰數日而老搆宣慰使緣歹護前安南王陳天平來朝奏曰臣故安南王烜裔孫也先王奉事大國無敢虧傳至臣煒賊臣黎計輝當國擅作威福臣瞻稍裁抑之便反刃向瞻而立其子顛顛即日焜也亡何更弒顛而立其子察尚在襁褓中更弒之而自立其子蒼爲大虞皇帝臣先被黜在外僅得免他子孫近者誅夷盡矣臣方欲集兵計恢復而季犛猝來掩倉

皇出鋒鏑問道抵老撾始得覩闕廷也夫興滅繼絕陛下之大恩也陳氏之遺燼得少燃者臣之大幸也上引見賜第居與裴伯耆處十二月安南賀正旦使者至上出天平示之使者識故王孫也錯愕下拜至流涕而裴伯耆以大義責之不能對三年正月遣監察御史李椅行人王樞切責安南國王耆令其實首罪安南兵寇明寧遠州掠吏士數百去五月安南王耆遣使臣阮景真等謝罪曰臣父子實陳氏甥以彼

宗族喪亡無可繼者故國人舉而屬臣耳臣飾賦率妻子躬力作奉上國之不暇疇敢抗天平其裔孫臣請歸而事之臣得完首領足矣祿州諸寨地已退還臣俯伏俟命誅之宥之惟陛下大度于是上悅遣行人聶聰往為約十一月聰還胡耆附表謝仍迎天平上於是勅廣西副總兵黃中呂毅將兵五千送天平歸國封胡耆順化郡公盡食所屬州縣天平陛辭賜羅綺鈔甚厚四年二月中毅以兵送天平至丘温耆

遣陪臣黃晦卿等候廩餼及牛酒犒師晦卿及諸從者見天平皆拜舞欣躍中間晦卿杳不至何也曰登踴躍俟命而天使儼然辱臨之敢不至第不有幸霜露之疾匍匐前道以俟中遣騎覘之無所見而迎者壺漿續於路遂前度隘留鷄陵折芹站山路險峻林木蒙密軍行不得成忽大呼伏發劫天平鼓噪振山谷且十餘萬人中等亟整兵擊之橋已斷賊遙拜且曰遠夷何敢勞王師天平實踈遠小人眩聖聽欲滅我

胡氏我幸得殺之以謝 天子中等歸上狀

天子大怒遂決意興師討安南成國公朱能新城侯張輔請行許之仍勅雲南總兵西寧侯沐晟練甲士以蜀兵八萬益之七月戊子朔祭嶽鎮海瀆神以出師告辛卯命成國公能為征夷將軍西平侯晟為左副將軍新城侯輔為右副將軍豐城侯李彬為左叅將雲陽侯陳旭為右叅將兵部尚書陳洽叅贊軍事都指揮同知程寬指揮僉事朱能等為神機將軍都指揮同知

毛八丹朱廣指揮僉事王恕等爲游擊將軍都
指揮同知魯鱗王玉指揮使商鵬等爲橫海將
軍都督僉事呂毅都指揮同知朱吳江浩僉事
方政等爲鷹揚將軍都指揮朱榮金銘吳旺指
揮劉塔等爲驍騎將軍發京衛浙江湖廣二廣
雲貴四川諸衛步騎舟師及土舍達官奔命共
八十萬人討安南能輔兵由廣西憑祥進兵入
坡壘鷄陵度富良江中路入晟兵由雲南路入
別勅占城王巴的賴以國兵擾其境十月戊國

公能卒於軍輔爲征夷將軍是月將軍輔發憑
祥渡坡壘關令都督同知韓觀以廣西兵運餉
修道伐木繕橋梁出游兵偵賊鷹揚將軍毅等
前哨攻隘留關取之敗賊三萬衆留兵守輔移
檄數季稜父子二十罪度關軍容整肅秋毫無
犯民悅降者相繼驃綺將軍榮等取鷄陵關復
敗賊三萬衆得軍資器械無筭次日輔度鷄陵
謀芹站兩傍皆有伏遣呂毅黃中以兵搜捕之
賊遂遁哨昌江市造浮橋築堡遣方政王恕哨

探直抵富良江北而大軍自芹站西折至新福
遣驃騎榮往約沐晟同進三帶州僞僉都鄧原
南策人莫遠莫遠等來見輔言賊恃僞東西都
及宣洮洩富良海潮希麻牢諸江自固綠江樹
柵築土城縣亘九百餘里盡發諸府州縣民二
百萬守之又於富良江南崖置椿水中盡取戰
艦列椿內都守備嚴時列象馬陣凡水陸號七
百萬我師自新福移營三帶州造舟圖進取十
二月副將軍晟奪宣江而軍次洮江北岸與多

邦城對壘將軍輔遣叅將陳旭會晟濟師驃騎
榮等大破賊於嘉林江將軍輔留都督高士文
舟師與朱榮應而自率大兵與副將軍合沿江
柵皆逼水不可上惟多邦城下沙坦可駐師而
賊設備密下設重壕壕內外布箐刺輔處分部
定夜四鼓遣都督黃中等啣枚舁以具過重壕
至西南城下以雲梯附城都指揮蔡福先登衆
蟻趨上賊不支遂下師隨入賊又城內巷戰驅
象前輔以畫獅蒙馬神機砲翼而前象披靡走

賊大潰殺其師梁民獻蔡伯樂鹵獲人象無筭
賊奔西都走五年正月朔將軍輔晟等襲賊籌
江柵大破之又攻困收普賴二山萬劫江斬首
三萬七千餘級獲僞團副工部曲又敗賊胡杜
於盤灘江踰兩日輔等次魯江賊五百艘犯我
軍逆戰大敗之獲艨艟百艘殺其將阮子仁等
萬級擒黃世罔百餘人皆誅之遂窮追季稔父
子至悶海口地下濕不可駐乃詳為還至鹹子
關令都督柳升守之賊果來躡輔回軍遇于富

良江賊舟亘十餘里又以精卒數萬趨陸來戰
輔與諸將奮擊大敗之斬僞翊衛將軍卜餘萬
級江水為赤乘勝追至悶海口季稔父子僅以
數小舟遁僞吏部尚書范見覽等降季稔等走
又安輔遣都督柳升前追之得舟三百永定衛
卒王柴胡等七人獨調得季稔所前格之縛送
升軍李保保等十人又擒季稔諸子於海口山
中次日土人武如卿等獲黎蒼等於永益海口
高望山安南平輔等露布獻俘闕下僞大虞國

上皇黎季犛偽大虞國主黎蒼偽推誠守正翊
贊弘化功臣云屯鎮兼歸化嘉興等鎮諸軍事
節度大使洮江管内觀察處置等使持節領東
路天長府路大都督府特進開府儀同三司入
內檢校左相國平章軍國事賜金魚袋上柱國
衛國大王黎澄偽大原鎮兼天開鎮驃騎上將
梁國王黎 偽新安鎮驃騎大將軍新興郡王
黎 賊孫偽太子黎芮偽郡嗣王黎滿偽郡亞
王黎滌幼孫五郎賊弟偽臨安鎮兼大安海鎮

驃騎將軍特進開府儀同三司入內相國平章
事賜金魚袋上柱國唐林郡王黎季貍賊姪偽
望江鎮輔國大將軍入內判中都督河陽郡亞
公黎原咎偽領龍興路都統府平陸縣上侯黎
子綽賊姪孫偽御輦一局正掌卿侯黎叔燾偽
清亭侯黎伯駿偽石塘卿侯黎廷燁偽永祿高
侯黎廷燠賊將偽入內僉聞朝政兼內侍省都
知知左班事諒山鎮推僉行軍行諒江路同知
總管府事賜金魚袋柱國東山卿侯胡杜偽入

內行遣同知尚書左司事樞密院副使阮光僞
正奉大夫入內行遣門下左諫議大夫同中書
公事兼三江路大守新安鎮制置使國子學祭
酒賜金魚袋護軍黎景琦僞寧衛大將軍知威
衛管左登翊軍賜金團符縣伯段鵬僞神勁營
高伯陳湯夢僞鈎鈐衛中郎將領龍捷軍兼領
壯勇營范六材凡二十五人上御正殿面詰季
犁父子頓首請死下之獄先是上勅輔訪求陳
氏後封之輔上言陳氏已絕無可繼者乞郡縣

其地詔可立交趾都指揮使司以呂毅黃中掌
之布政按察二司以尚書黃福兼掌之前工部
侍郎張顯宗等為布政使以下官有差前來歸
附裴伯耆為按察副使凡交州北江諒江三江
建平新安建昌奉化清化鎮蠻諒山新平演州
又安順化府十五衛十千戶所二州四十一縣
二百八十地東西相距一千七百六十里南北
相距二千八百里安撫人民三百二十一萬有
奇獲蠻人二百八萬七千有奇糧一千二百六

十萬碩象馬牛合二十三萬五千九百有餘舟
八千六百七十七艘兵器二百五十三萬九千
八百五十二立制詔太宰大司馬新城侯輔功
最大西平侯晟次之其進封輔英國公晟黔國
公賜金幣冠服晟殺十之一都督升封安遠伯
黃中呂毅得贖罪餘手捕黎季犁及蒼者授三
品官有差

鳳洲筆記卷之十七

鳳洲筆記卷之十八

海虞文臺黃美中校

安南傳二

簡定者陳氏故臣也不肯事黎季犁而輕騎跳
歸明既從下安南爲別將頗有功矣定知上雅
不欲復陳氏後還待命頗與故所親陳希葛約
竄行至興化州說群盜鄧悉等下之聚衆至萬
餘益南合慈威蠻行剽下大堂應平石官諸州
邑勢轉盛遂自稱大越上皇改元興慶陳希葛

爲太保郡公八月鎮守尚書黃福來告急上命發郡邑兵四萬征南將軍黔國公晟討之兵部尚書劉儁贊軍詔降者待以不死十二月黔國公與簡定戰於生歟江敗績都督呂毅尚書劉儁左叅政劉昱皆死之上怒七年大發兵復拜英國公輔爲征夷將軍黔國公晟爲副將軍八月大破賊於鹹子關獲舟四百艘尋又敗賊盧渡江又敗之於太平海口賊帥鄧景異獨身奔陳季擴季擴者蠻人奸黠自云陳王後也安南

民不忍弃陳王則相率歸季擴別據地稍遠明兵而明兵悉窮追簡定至演州分晟兵從磊江南都督朱榮舟師從江中行抵牛鼻關輔自率騎卒趨地冊合美良簡定望見震恐潛行之民家弃馬走吉利柵深山內大索捕執定并其將相陳希葛阮汝勵等送京師磔於市八年正月英公國逐捕其黨阮師檜於東潮州斬首伍千級獲僞將軍范支陳原卿等二千人悉阮之築尸爲京觀是月天子勞苦征夷將軍又暴師役

召還朝於是英國公上言簡定固伏誅而陳季擴及其部陳原樽阮師胡具鄧景異鄧鎔潘季祐各率兵掎角相援未即下演州清化諸鎮通被殘而又塞神投福成江口道請多留兵付沐晟期盡賊乃已詔曰善其以征夷將軍麾下益晟五月晟進擊破季擴等於靈長海口斬首三千十一月季擴使使上表請降詔以爲交陞布政使陳原樽阮師胡具鄧景異爲都指揮潘季祐爲按察副使趣之任然季擴實詐言緩師兵

耳不復肯之任而掠如故詔英國公復往會計之破賊於月常江殺溺者一二萬十年八月復大破賊於神投海擒僞翊衛大將軍鄧汝戲等數千人悉磔之十月其少保潘季祐遁可雷山乞降輔承制季祐以按察副使理又安而其將帥陳敏阮士勤等相繼降矣十一年十二月英國公輔等復大破賊於愛子江昆傳山蹂躪其象陣斬僞少尉阮山等十二年五月獲季擴及其太傅阮師等送京師戮於市行賞宴南征將

士賜英國公輔黔國公晟金五百鈔二萬錠帛絹各五十餘有差亡何黎季犛釋自獄克戎廣西而季犛子蒼澄各以善兵器用累官俱至工部尚書爲別賜姓也豐城侯李彬以將軍填交趾定歲貢扇萬把翠羽萬箇十六年正月豐城侯上言清化巡檢黎利叛利故王季擴臣也善戰挾計數爲金吾將軍來降授巡檢而因人心不大德明故遂反行剽郡邑自稱平定王拜弟石相國段莽都督豐城侯使叅將朱廣等討捕

頗獲首六百餘而利剽如故十八年四月左叅政馮貴右叅政侯保與戰俱敗績死之二十二
年七月仁宗皇帝即位中遣官山壽諭降授靖化守是月都指揮陳忠敗死利攻茶籠郡守琴彭堅守不下洪熙元年七月 宣宗皇帝即位詔叅將陳智發兵救之智逗遛不即救茶籠潰琴彭戰死時宣化嘉興等賊周文莊等合雲南寧遠州紅衣賊出劫掠勢盛甚皆遙受利度節宣德元年二月叅將智與都督方政等進擊利

於茶籠州大敗歸四月太子太保成山侯王通
爲征夷將軍都督馬瑛爲參將發步騎十餘萬
討利尚書陳洽參軍事陳智方政削官爵白衣
隸軍中自效九月以廣西兵五千益王通十月
黎利弟善據廣威州都指揮袁亮指揮王冕司
廣陶森輔等禦賊僞爲敗者走亮追之渡河伏
發亮被執森輔歿吏士陷者五百餘冕廣僅以
餘兵歸坐失陷大將徵十一月黎善衆數十萬
來攻交趾城分三道俱拒却之成山侯通於是

悉兵出擊善參將瑛別率兵大破賊於清威至
石室合通俱抵應天駐寧橋諸將言地險惡多
伏宜遠斥堠持重擇便通不從麾衆渡天雨且
泥濘人馬蒲伏不成列而伏群起衝盪軍遂大
壞散死者二三萬人尚書洽亦與焉黎利時在
又安聞之自以精兵來會圍東關通敗後氣沮
陰遣人許爲利乞封而檄清化迤南地歸黎氏
其吏民悉出城赴關獨清化守羅通謂指揮何
忠曰吾守此數賊恨深矣出賊尾而掩之必覆

元帥非君命而欲壺城賊乎不可連與賊戰敗之十二月成山侯通來告急以太子太傅安遠侯柳升為征虜副將軍保定伯梁銘又副之都督崔聚為叅將九步騎七萬人太傅黔國公晟為征南副將軍興安伯徐亨新寧伯譚忠為左右副將軍發滇爨兵討師行遣太子少保兵部尚書李慶叅軍事二年二月黎利來攻城急而成山侯日夜訓精兵伍千出不意猝擊利大破之斬其司空丁禮司徒黎豸太監黎秘諸太尉

少尉正督同督而下萬餘級利皇惧不能軍欲走諸將請乘勝急追之而通猶豫不決賊得以暇樹柵立寨掘壕塹脩器械四出攻掠未幾勢復張三月圍丘温都指揮孫聚拒破之詔發四川湖廣諸省兵四萬五千人益征南征虜兩將軍四月利以八萬人破昌江中官馮智指揮劉順知府劉子輔俱死之五月黎利來乞和成山侯通等以聞九月九月安遠侯升等至交趾隘留關黎利偽為其國人書詣軍門乞立陳氏後

升不啓封奏聞上而趣兵進破關隘大小數十
如無敵者升意殊易之抵鎮夷關保定伯銘尚
書慶俱坐瘴暑病寢劇禮部郎中史安主事陳
鏞言於慶曰主帥氣甚驕兵累日不得休固罷
矣而少斥堠不據險握重而欲急發卒如敵伏
何慶力疾以語升升唯唯抵倒馬坡獨以百騎
前渡橋橋壞陷泥淖伏兵起升中刃死是夕梁
銘以驚死李慶又死崔聚因宿將然倉卒不復
能約束吏士而吏士又新喪元帥沮且囂過昌

江賊率象陣來衝師遂潰聚與史安陳鏞俱被
執不屈死之七萬人無遺者成山侯謀知升敗
益懇更啗利請和弃交趾而教利行求得陳氏
它族鬻者僞立爲請上心憂南方事晨朝諸大
臣而顧英國公輔曰交趾柰何輔曰安遠成山
侯非將也而少發兵少發兵不足以制敵臣請
出保以一年擒利上嘿然退而召尚書義原吉
大學士士奇榮計兵力非能加太宗時也太宗
三下交中國士馬物故幾萬轉漕度支大小費

七十億得城三百餘而亡尺寸之利十餘年間
叛者四五起今縱或勝平利後竟非我有也乃
許之利素表進代身金人及向所掠都督等萬
三千三百九十一人馬騾千二百疋成山侯輒
引還至京以擅矯制下獄當斬贖為庶人三年
五月行在禮部右侍郎李琦工部右侍郎羅汝
敬勘實還黎利使使言陳暲者正月病死無後
諸為陳氏後者悉絕臣利謹守封疆俟命詔更
遣汝敬往切責利俾更訪實以聞及索中國人

無隱是月利圍廣原州州將閔色新固守不下
四月汝敬還利附使貢方物且奏言陳氏子孫
實已盡嚮所喪吏士兵器家屬悉因成山侯師
還之矣臣利有女九歲於亂兵中失之後乃知
為中官馬騏進克官婢陛下幸旣已赦臣罪歸
此女臣銜戴恩德萬死無二六年五月利遣使
何栗等入貢兼請封六月遣行在禮部右侍郎
張敞右通政徐琦持詔利權署安南國事六年
二月利使阮文狗等附敞琦謝并貢金銀器皿

方物九年利卒子麟嗣麟卒子濬嗣亡何濬庶
長兄琮因會醜殺濬自立使來告哀乞封英宗
天順四年遣通政叅議尹旻給事中王豫持節
封琮而會王濬弟灝率衆討洙琮事聞詔停旻
豫行而以五年命翰林侍讀學士錢溥改授冊
灝初有國耻屈下欲殺所以見使臣禮溥七爲
書貽之徃復甚苦乃定憲宗成化七年王灝侵
占城十七年復侵老撾來告急上諭之曰朕代
天理物不忍兩國橫罹兵禍其已之孝宗弘治

十一年皇太子出閣遣太子洗馬梁儲賜詔其
王使使隨入貢謝恩武宗立遣脩撰倫文叙等
賜詔正德十年其王暘復使使來貢方物十年
國相陳暘等作亂弒暘國人立暘兄諲而暘率
衆據掠山諸府地諲累有表貢及乞師討暘不
得達而會其郤指揮莫登庸降諲登庸者蠻人
也勇而善戰繇武舉累遷隸暘以罪奔諲大喜
用爲宜陽叅將將而與陳暘戰大破殺暘還進
封川伯時國將鄭綏阮弘裕者世臣也坐爭權

鳳洲筆談卷之九 九
不相睦罷歸登庸冬齋遺金珪賂王諲所親信
文臣曰王知國所以弱乎在世臣植黨而市勝
王不若拔寒賤有大將畧者任之王諲遂任登
庸既已任則與所厚謀夜率兵逼圍王宮王諲
間行得脫至清華嘉靖二年今皇帝遣編修孫
承恩等以即位告不得達而登庸遂立黎氏踈
屬慮為王已相之易號令練兵積粟國人不復
曉黎氏矣尋娶慮母已又鳩殺慮而立已子方
方瀛仍冒慮名氏僭號曰統元凡王諲兩遣使

來請兵俱為登庸篡取不得進亡何王諲卒世
子寧立結國人襲擊登庸大敗之登庸跳之海
陽據上洪下洪荆門南策太平諸郡寧還國悉
發兵二十餘萬起鄭綏將而攻圍海陽一月登
庸固守不下而別選兵萬餘舟行出大江竟掩
都門寧錯愕走清華登庸掠庫藏及張世子旗
蓋而還呼曰得王矣鄭綏兵大潰壞散奔父之
寧復悉清華兵討登庸相拒不決登庸陰結土
帥郭遼鶴使襲寧復大敗九年登庸遂僭稱大

上皇帝子方瀛爲國大王改號曰大正拜其腹
心臣裴堵爲丞相填海陽武護爲西軍都督填
山西阮如桂爲北軍督都填京北阮伯驪爲南
都督杜世卿軍爲東軍都督俱填山南阮立爲
總太監填河北太監阮世恩中軍都督楊金鑣
兵師范嘉謨禮部尚書阮時雍苦執朝政十六
年明皇太子生詔遣使告禮部尚書言言前往
諭不達究所由未報詔促報而世子寧間道使
陪臣鄭惟獠來乞師而宣光總兵使武文淵左

都督黃明哲等各據地請內應當是時天子銳
意討登庸群臣諫不聽亡何登庸使所親杜文
莊來覘我師獲之文莊言方瀛都黎王故京有
精兵肆萬人戰象百舞象五馬五百疋舟五百
艘而登庸出填都齋無城四圍鉄力木作排柵
兵可五萬人象馬及舟如前而又言登庸六十
餘矣騎捷不施銜勒所有國土十八黎王僅得
清華數郡藉占城援耳魯使其大帥譚百步以
兵二萬來討大敗失百餘艘而去詔下文莊獄

而使兩廣滇蜀諸鎮整兵待登庸聞之惧使使以地圖人民藉來獻請委國附然實無意持緩我師耳詔不許拜威寧侯仇鸞爲征夷將軍兵部尚書毛伯溫叅贊軍事得專生殺征蠻將軍安遠侯柳珣兼征夷副將軍兵部侍郎蔡經以二廣兵合征南將軍黔國公沐朝輔以雲南兵合凡三十萬人壓境登庸來言願得束身自投請決死尚書伯溫與左叅政翁萬達計今兵食非能加我太宗時也不許而深入勝則可萬一

負當壞散不振爲中國耻遂開軍門見之解縛待以禮而彼此俱盛戒不得發登庸上表進代身金人贖罪仍請封詔拜爲安南都統秩二品銀印兵遂罷歸尚書伯溫等以功進秩有差而登庸遂急擊滅黎王矣登庸死子方瀛嗣貢不絕

論曰西南夷君長以十數安南爲最鉅地抵中國得十一戶口得十二漢置九郡後共賦稅出力比於中土焉人物如阮翁仲姜公輔輩皆自

奮勵起爲將相有聲至宋始弃以畀其酋然猶授王官貢子貢物饒富不敢妄異同也宋弱漸以恩寵縻其逸彼益驕不復覩中國大矣元得志直北際萬里不譚而通欲脩漢舊累發兵伐之三四入國都終靡要領當是時東南吏士物故者十餘萬轉漕饋餉之費不可貲計更遣使好喻數彼巧摭厚幣陽餌而陰扞焉大都之闕庭終不可望其世子之跡迨明太宗文皇帝拜征夷將軍大發兵討之擒僞王伏斧鎖闕下

畫經界置吏受約束夷樂夷俗畏恐明法峻旋叛雖得屬圖版之末二十餘年大司農量得喪乃百不當一耳宣皇帝難用兵采楊士奇楊

榮議罷之南土稍息肩然交州均迄今云

洪武時傳將軍下雲南得大理郡大理古六詔唐時勝兵近百萬與中國抗幾併蜀今彬彬然內郡無慮矣用兵等耳豈善後之策異耶非耶國家地羸於交州而取奇大理稍相折然去漢唐時間矣建議者非不蘄津津復也往年莫氏

鳳洲筆卷之十八
之役興獨 主上銳而群尼之此豈偷佚忘大
哉善理疾者必先究吭領要害而餘功建於肢
節虜勢方跳梁歲殺掠吏士孤不得壯壯不得
老而供餉坐疲矣舍吭領要害之究而事肢節
非有大益且有異害昔吳王北破齊盟晉而越
入吳王且未慮吳也而欲伐宋其臣諫曰王得
宋小不能居而失吳王乃歸此征安南之說也
伐宋非失策也吳固而後宋可伐也

鳳洲筆卷之十八

